



## Terenga 2: Hōtaka 15 – mai i...

Tēnā anō rā koutou kua whakarauika mai ki raro i te maru o Ako. He hōtaka hei whakapiki i te reo o te hunga e mōhio kē ana ki te whakairo i te kupu, engari e whai ana kia ātaahua ake ngā whakanikoniko. Nau mai, tomo mai me tō whao.

### Hei Mahi Whakarongo

Kua roa te kuia e whai ake nei e whakapeto ngoi ana kia hōrapa te reo Māori i te motu whānui. Ko ngā rākau karakara o Te Ataarangi tāna whao hei whakairo i tōna waka reo Māori. Ko te reo me ngā tikanga hei ō mō te haere. I a koutou e whakarongo ana ki ana kōrero, whakautua ēnei pātai.

1. Ki tāna kua tae ki te wā me pēhea tā tātou kimi i te wairuatanga?
2. He aha ētehi o ngā rerekētanga o te ao kikokiko i te ao wairua?
3. Hei tāna, i pēhea tō tātou tīmatanga, ka pēhea hoki tō tātou otinga?

### He Whakamārama

Hei whakahoki i ngā mahara ki tētehi wā o mua, ka taea te whakamahi ngā kupu 'mai i...'. Tirohia ēnei tauira:

- a) Mai i taku taenga ki te kura, he pai ki a au te pāngarau.
- e) Mai i te tau 1983, kua whaikōrero taku matua.

Mehemea nō mua noa atu te wā, ka taea te whakamahi ēnei kīanga:

- i) Mai, mai, kua whakaaro nui te Māori ki te taiao.
- o) He tikanga nō mai rā anō te whakahoki i te ika tuatahi ka mau, ki a Tangaroa.

### Hei Manatu

E ora ai te reo, me whanake te puna kupu o taua reo e taea ai e ōna kaikōrero ngā āhuatanga o te ao hou te kōrero. I tēnei terenga tuarua o Ako, ka rangona e tātou te pūtaka o ētehi kupu i titoa e Tīmoti Kāretu mā i ngā tau tīmatanga o Te Taura Whiri i Te Reo. . Ko ētehi o ēnei kupu kei te rangona whānuitia i ēnei rā. Kua tino tangata whenua aua kupu ki ō tātou hinengaro. I tēnei rā ko te kupu ka whakamāramahia ko tētehi mea ka kaha kitea i ngā tari o ngā kaimahi puta noa, arā ko te 'kōnae'.

**Tiakina ērā kōrero i roto i tētehi kōnae, ka raua ai ki roto i te kōpaki i runga i tō rorohiko.**  
*Save that information in a file and put it into a folder on your computer.*

### Hei Mahi

**Whakamāorihia ēnei rerenga:**

1. I've liked that haka group for ages.
2. I was in the army from 1938 to 1949.
3. The Māori language has been an official language of New Zealand since 1987.
4. Since the beginning of creation, Māori have believed in Rangī and Papa.
5. From the age of 7, I began to dance.

### Whakautu:

1. Mai, mai taku pai ki tērā kapa haka. / Mai rā anō taku pai ki tērā kapa haka.
2. I roto au i Te Ope Taua a Tūmataunga mai i te tau 1938 ki te tau 1949.
3. Mai i te tau 1987 kua mana ā-ture nei te reo Māori i tēnei whenua.
4. Mai i te orokohanga o te ao, e whakapono ana te Māori ki a Rangī rāua ko Papa.
5. Mai te wā e whitu taku pakeke, i tīmata au ki te kanikani.